



48

QUÆSTIO MEDICA,
CARDINALITIIS DISPUTATIONIBUS
MANE' DISCUTIENDA
IN SCHOLIS MEDICORUM,



Die Jovis vigesimâ septimâ Martii 1710.

M. FRANCISCO GOUEL,
DOCTORE MEDICO ET SCHOLARUM PROFESSORE,
PRÆSIDE.

An Aër qui temperatissimus videtur, perinde omnibus salubris?

I.

CORPUS à corpore, naturam à naturâ differre, non tam Hippocratis effatum quàm ipsius Naturæ vox. Materia nec uniusmodi nec sui similis uspiam reperitur. Animalium corpora quantò compositiora sunt, tantò magis præ cæteris varietati obnoxia. In hâc varietate explorandâ omnem suam genuinus Medicus operam consumit; ut inde varium medendi genus excogitet. Cui aëri, morbo contumaci languentem committat sollicitus, an stricto sit æger, an fluxo habitu? expendet: fabricam pulmonis pectorisque scrutabitur: sitne amplius ductilisque pulmo, minimo aëris haustu inflabilis? an verò contrà arctior atque adeò compactior, illabenti toto pondere aëri vix obsequens? an vesiculæ pulmonares flexi-

les, rigidæve? bronchia patula, aut obstructa? Nec minùs attendet ad liquorum, quibus perluitur hoc viscus, indolem; raturum habens, maximum ad pulmonis integritatem momentum asserre sanguinis præsertim qualitatem ac motum.

II.

NEC mira est tanta corporum in eâdem etiam animantium specie à se invicem discrepantia. Effectus causarum sortem sequuntur. Diversam naturam induunt Homines, qui causis non-naturalibus diversè utuntur. Aëris præ cæteris eximia potestas: ipse innumeris causis, quibus variè afficitur, obnoxius, affectiones suas in corpora sibi immersa transfundit. Porro varietas aëris non tam ejus naturæ assignanda, quàm terrearum & aquearum particularum quibus inficitur admistioni. Ille siquidem purus merulque (si fas est suspicari) congeries est particularum homogenearum, quæ Terræ poris ceu uteris propriis, cæterorum Animantium instar, adultæ, motu vorticis in Atmosphæram abripiuntur; ubi interflui ætheris æstu inter se agitata, liquorem aeræum constituunt. Diductis à se invicem particulis illis præ calore, rarefcit aër; coactis ob frigus, densatur. His præterea elaterem tribuere commentitium est, quia superfluum. At pondus inesse in aereo liquore, idque varium pro loci conditione, nihil testatius. In his omnibus uber est causarum proventus, unde aër tantopere ab aëre discrepet; sive gravitatis nomine, sive ob calorem & frigus, sive tandem pro corpusculorum heterogeneorum naturâ. Ab his fon-

tibus procul dubiò tantæ in naturis Hominum diffimilitudines; ut alia aliis sint, pro vario Cœli tractu, non solum temperamenta, sed etiam mores & ingenia: quin ejusdem Cœli mobilis humor non ocyùs vias mutaverit, quàm animorum species vertentur & pectora alios atque alios motus concipient.

III.

PRODIGIO simile foret, si quæ diversis causis debent originem, ab unâ eâdemque conservari possent. Naturæ est consentaneum ut idem aër non æquè conveniat Animalibus, quibus diversus à primordiis ingeneratus est. Juvat aër, aut lædit Animalia multifariam intrùs & extrinsecùs. Pondere aëris respiratio perficitur, absque ope nitri aerei, quod alterum est commentum cum aëris elatere repudiandum: neque enim ulla sit aëris & sanguinis in pulmone mixtura. Respirationis autem non unum emolumentum: præcipuum, ut chylus, simul advenit, accuratè sanguineo cum latice permisceatur. Frigore præterea & calore pulmones aër afficit, sicut & universum corporis habitum: unde patet, quantæ in ἀέρος διαπνοῆς negotio sint Aëris partes. Denique in sanguinem inductus aër eâdem viâ quâ cibus & potus, ei forsân aliquid ad motum impertitur; tum suas qualitates, si quas habet, allinit.

IV.

SOLEMNE est Mortalibus vitium, non tam ex naturâ rei, quàm ex suis commodis rem æstimare. Gallis optimo aëre se uti persuasum est, quippe sibi salubri: at Lapponibus non idem erit judicium;

qui Sueciam nequeant adire, quin jam æstuentes sub dio pernoctent. Vice versâ qui sub curru Solis degunt, apud nos algebunt. Hinc multis in morbis nulla ægris peregrè agentibus præsentior medicina, quàm ut natali aëri quantocyùs reddantur. Morbi tamen vitio sæpè fit, ut aër alienigena natali sit præstantior. Sic tabidis asthmaticis patrium aërem mutare aliquando expedit. Visus est adolescens, qui in Gallo-provinciâ quot-annis ineunte Vere ἀνὰ τοὺς φάκτους, vocem reciperet, ex quo Lugdunum migrans, crassiorem aërem hauriebat. Quid cæteros casus commemorem? Notum etiam Chirurgis, capitis vulnera regionibus paulò calidioribus periculosa esse, quæ frigidioribus periculo vacant: contra verò tibiarum vulnera se habere, eadem experientiâ compertum est.

V.

AEREM igitur esse, qui unus idemque sit æquè omnibus salubris, rerum Naturæ repugnat. Hæc magistrâ Medicus docetur, nihil fermè esse adeò universè bonum aut malum, quod omnibus ac semper profit aut noceat: sic Medicinam universalem in votis semper futuram; ut Scepticorum axioma, πάντα ῥεῖς ἢ σὺν ἡμῶν ἢ κατὰ ἡμῶν, si uspiam valet, in arte Medicâ potissimum obtineat.

Non ergò Aër qui temperatissimus videtur, perinde omnibus salubris.

Proponebat Parisiis CAMILLUS FALCONET,
Lugdunæus, Baccalaureus Medicus. A. R. S. H. 1710.

Typis Viduæ Francisci Muguet Regis & Facultatis Medicinæ Typographi.